

10 DAYS OF PRAYER

WWW.TENDAYSOFPRAAYER.ORG

Okuddayo ku Kyooto – Nja Kukeeranga Okukunoonya

OLUNAKU 5 – YESU, OMUKEEZE MU KUGOLOKOKA

“Naye ekiseera kijja, era kituuse, abasinza amazima lwe banaasinzizanga Kitaffe mu mwoyo n’amazima; kubanga Kitaffe anoonya abali ng’abo okubeera ab’okumusinzanga” (Yokaana 4:23).

Amazima Ag’ekyoto

Waliwo “amazima ag’ekyoto” mu bulamu bwa Yesu agatalina kusuba Mukristaayo yenna. Okusinziira ku nnaku eziyise, tutunuulidde nnyo ensonga ey’ebyoto okuyita mu Byawandiikibwa n’obulamu bw’abo abaabizimba. Ekyoto kyeyambisibwa nga ekifaananyi eky’ekifo n’ekiseera eky’okusinza Katonda ow’amazima era omulamu. Omuntu talina kubeera na Kyoto ekikwatikako okusobola okusinza Katonda. Eky’amazima, omugoberezi wa Yesu bw’atambulira mu bulamu obw’olubeerera, obw’okunyiikira, n’okutabagana ne Katonda okw’omu Bayibuli, abeera amaze okuzimba ekyoto ekyefaananyirizaako ekya Eriya kyennyini kye yaddaabiriza ku lusozi Kalumeeri (1 Bassekabaka 18).

“Ekyoto” eky’engeri eyo tukiraba mu bulamu bwa Yesu. Wakati mu kayisanyo k’obuweereza Bwe obwa buli lunaku, okutiisibwa okutakoma, n’obulumbaganyi bw’omulabe obutasalako, Yesu yafunangayo obudde obw’okwemalira mu kusaba n’okusinza. Oyo eyali ku ddaala lya Kitaffe (Abafiripi 2:6) yasigala ng’akitwaala nga ensonga enkulu “okusirika n’okumanya” nti Katonda ye Katonda (Zabbuli 46:10). Yesu yava buto ng’ategeera nti okuyitibwa Kwe kw’ali kumwetaagisa okubeeranga n’enkolagana eya buli kiseera ne Kitaawe. Eno y’eyali engeri yokka ey’okwetikkamu ebibi by’ensi okubituusa ku musaalaba.

Abakeera Okunoonya Betaagibwa

Mu Makko 1:35 Yesu yagolokoka “mu makya ennyo nga bukyali kiro” n’afuna ekifo ekisirifu okwogera-n’okuwuliriza-Kitaawe. Olunaku olw’ali luyise lw’ali lumaliddwa mu buweereza obujjuvu – mu kuwonya abalwadde, okugoba ebyokoola, n’okununula abaabula. Abayigirizwa bwe baagolokoka, baakizuula nti Yesu yali agenze era bwebatyo ne bamunoonya. “Bwe baamulaba ne bamugamba nti, ‘Bonna bakunoonya’” (Makko 1:37). Okwanukula kwa Yesu ky’ekijjukizo eky’amaanyi ku mukisa ogulindiridde bonna abettanira ekyoto kyabwe eky’okumakya n’akawungeezi.

“Tugende awalala mu bibuga ebiri okumpi mbuulire n’eyo; kubanga ekyo kye najjirira,” Yesu bwe yabagamba (Makko 1:38). Ekyo mukitegedde? Yesu yali ayolekedde akatyabaga ak’amaanyi; Okusigala mu kifo mweyali – amaka ga Peetero – n’okugenda mu maaso n’obuweereza omwo. Oba, okuva mu kifo ekyo okugenda mu kirala omutannagezesebwa maanyi ga buweereza. Abakristaayo batono ensangi zino abandireseeyo obuweereza obugimu okudda mu bulala obutamanyiddwa. Kyokka

Ye Yesu ekyo kyennyini kyeyakola nga teyesise namu. Yasobola atya okukola okusalawo okutuufu? Katonda Kitaffe yali abikkulidde Yesu enteekateeka z'olunaku olwo ng'ali mu kiseera Kye eky'okusinza okw'ekyama. Kitaawe yakakasa ekigendererwa kya Yesu ng'asaba wamu n'okulindirira mu maaso Ge.

Ab'emikwano, bwe tulemererwa okukeera okunoonya Katonda mu kusinza n'okusaba, tubeera tusubwa enteekateeka za Katonda ez'olunaku lwaffe wamu n'okukakasa ekigendererwa kyaffe. Olwa leero ka tusabire okumalirira kwaffe mu kukeera okugolokoka n'okuwaayo obudde nag tuli wamu ne Katonda okusobola okumuganya atuukirize ekigendererwa Kye mu lunaku lwaffe ne mu bulamu bwaffe.

Ka twogere eri Katonda waffe.

Ekiseera eky'Okusaba (Eddakiika 30-45)

Okusaba okw'Ekigambo kya Katonda – Yokaana 4:23

“Naye ekiseera kijja, era kituuse, abasinza amazima lwe banaasinzizanga Kitaffe mu mwoyo n'amazima: kubanga Kitaffe anoonya abali ng'abo okubeera ab'okumusinzanga.”

“Abasinza Ab'amazima”

Ai Kitaffe, tuyigirize mu mirimu gyaffe egya buli lunaku, mu nsonga enkulu n'ezo ez'obulamu obwa bulijjo okumanya engeri ey'okukusinzanga. Tuyambe obutaddamu kukugira kukkiriza kwaffe, tukomye okulowooza nti okusinza gwe mukolo ogukoma ku Ssabbiiti, wabula tukutunuulire mu mazima nga engeri y'obulamu obw'essanyu ery'ensusso. Tusaba tusigalenga nga tuyungibwa ku Ggwe bulijjo era tubeere abasinza ab'amazima aba Katonda yekka ow'amazima. Amiina.

“Okusinza Kitaffe mu Mwoyo n'Amazima”

Webale nnyo Katonda olw'okuba nti tusobola okukusinziza buli wamu wetuli na buli wamu wetwagalira. Otuwulira nga tuli mu maka gaffe, ku mirimu, ku kkanisa, ne mu kutambula. Tukutendereza olw'okubeerawo Kwo eri abaana Bo essaawa yonna. Ai Mukama, tuluyanyame mu mazima gonna okuyita mu Mwoyo Wo Omutukuvu olwo nno okusinza kwaffe wamu n'obulamu bwaffe bibeere mu nkwatagana n'amazima gonna. Webale nnyo Katonda olw'okutukulemba mu mbeera ey'okusinza okw'amazima. Amiina.

“Kitaffe Anoonya Abali Ng'abo”

Kitaffe ow'ekisa, okwagala kw'olina gyetuli kusukka ku kutegeera kwaffe. Wandiyagadde tubeere kumpi naawe. Otunoonya nga bwekisoboka era oli mweteeefuteefu okutuwa byonna bye twetaaga. Tusaba otusonyiwe nga tukugayaaliridde ne tubulwa obudde obw'okubeera naawe. Tukimanyi nti totwesibaako bwesibi. Webale nnyo olw'obukakafu nti bwe tukuyita okutabagana naffe, ojja kubeera wakati mu ffe. Amiina.

Ebirowoozo Ebirala eby'Essaala

Okwebaza n'okutendereza: Muweeyo okwebaza olw'emikisa egimu n'okutendereza Katonda olw'obulungi Bwe.

Okwatula: Waayo eddakiika entonotono olw'okwatula okw'ekyama n'okwebaza Katonda olw'okusonyiwa Kwe.

Okuluyanyama: Musabe Katonda abawe amagezi okuyita mu bisoomooza n'okusalawo ku bigenda mu maaso.

Ekkkanisa Yaffe: Musabe Katonda okuwa omukisa emirimu egy'ekkanisa yaffe mu kitundu, mu bbendobendo, ne munsu yonna.

Obwetaavu bw'Ekyalo: Musabire obwetaavu bw'abakkiriza mu kkanisa, ab'enyanda, ne baliraanwa.

Okuwulira n'Okwanukulwa: Muweeyo obudde okuwuliriza eddoboozi lya Katonda n'okulyanukulira nga oyita mu kutendereza oba mu luyimba.

Ebirowoozo ku Nnyimba:

- i. Give Me Jesus - (#305)
- ii. In the Garden - (#487)
- iii. I Will Early Seek the Saviour (#539)
- iv. Turn Your Eyes Upon Jesus (#290)
- v. Give Me Oil in My Lamp -
- vi. He's Able
- vii. Into My Heart
- viii. Thy Word Is a Lamp Unto My Feet